

REGIONAL NEWS

HEADLINES:-

1. Mizoram Lok Sabha bial inthlan lo awm turah candidate 6-in an chuh dawn tih a chiang tawh.
2. Mizoram Rural Bank chairman ngenna angin MRB Champhai Branch-a sum puktir dana thil dik lo tak awm ni a hriat chu CBI kutat hlan a ni.
3. Rawng kutpui, Holi, ram pumah uar taka hman a ni.
4. BJP-in Lok Sabha inthlanpuia an candidate tur hming 111 a puang leh.

<><><>

LS POLLS - CANDIDATES

April ni 19-a Mizoram Lok Sabha bial inthlan vote thlak turah candidate 6-in an chuh dawn tih a chiang tawh a, mi 5 hi political party in an dintir an ni a, 1 chu independent a ni.

Mizoram Lok Sabha bial chuh tur hian rorellai ZPM chuan Pu Richard Vanlalmangaiha chu an party candidate a ni tih an puang tawh a. Kar kalta Zirtawpni khan chuh tumin Aizawl district DEO leh Returning Officer Pi Nazuk Kumar hnenah a nomination a thehlut tawh a. MNF candidate, Rajya Sabha member ni lai Pu K. Vanlalvena pawhin Nilaini khian nomination a thehlut dawn ni a thudawn a ni. Mizoram Pradesh Congress Committee (MPCC) chuan Lok Sabha inthlan chuh turin an party candidate atan MPS officer chawl ta, Mizoram Home Secretary atanga pension Pu Lalbiakzama chu an thlang a, ani pawh hian naktukah nomination thehluh a tum bawk a. PC Party chuan an party candidate atan Pi Rita Malsawmi hming an puang tawh bawk a. Ani hi kum 1971 a Mizoram Lok Sabha bial kan neih atanga MP chuhtu hmeichhia 3-na a ni. BJP chuan an state unit president Pu Vanlalhmuaka a din tur thu vawiin khan an puang bawk. Kum 2019 a independent a Lok Sabha MP chuh tawh mining engineer chawl tawh Pu Lalhriatrenga Chhange te chuan independent bawka tun tum Lok Sabha inthlanpui hi chuh a tum thu a sawi a. Naktuk hian nomination a thehluh dawn thu a sawi.

Hetih lai hian political party hrang hrang leh MP candidate te hian inthlan campaign an tan tawh a. MPCC chuan Ningani khian Lok Sabha inthlanpui lo awm tur atan campaign beihpui an thlak tan dawn a. Tun tum Lok Sabha Mizoram bial inthlanna tur atan hian Election Commission chuan March ni 20 khan hriattirna a tichhuak a. Khami ni atang khan nomination thehluh tan theih a ni a. Chuh tumte hming pekluh theih hun hi Nilaini khian a tawp ang a, a tuk Ningani-ah nomination lekhate endik a ni ang. March ni 30 khi hming pelutte'n an nomination an hnuhdawh theihna ni hnuhnung ber a ni dawn a. April ni 19-ah vote thlakin June ni 4-ah vote tlate chhiar a ni dawn a ni.

<><><>

BJP CANDIDATE

April ni 19-a Mizoram Lok Sabha bial inthlanna vote thlak turah Mizoram BJP chuan an party candidate atan Mizoram BJP President ni lai Pu Vanlalhmuaka a nih thu vawiin khan an puang.

BJP hian an party office conference hall-ah candidate puanna hun hi an hmang a. BJP candidate tur Pu Vanlalhmuaka chuan Mizoram thenawm state chuan sorkar laipui an thawhpui a, an state mamawh hmasawna atan central sorkar an pûr theihna atan an thawhpui vek a ni tih a sawi a. Manipur, Nagaland leh Meghalaya te chuan sorkar laipui rualin ke an pe avangin an state mamawh hmasawna an hawn thin a ni a ti.

Pu Vanlalhmuaka chuan kumin MP inthlan lo awm turah Mizoram chu BJP thawhpui hmarchhak state pali zinga official candidate nei an nih avangin Central Minister nei thei a ni, a ti.

<><><>

CEJS

Centre for Environment and Social Justice (CESJ) chuan solar plant atana village council (VC)-te hnena ram an dilna hnûk kîr turin Power & Electricity department an ngen.

CESJ chuan, Mizorama solar power dinhmun ngun taka an zir thu tarlangin, Mizoram khaw hrang hranga VC-te hnena an ram chhunga solar plant hmun tur dilna lehkha kumin February ni 19-a an tih chhuah tawh chu a rang lama hnûk kîr turin P&E department an ngen a ni.

Public private partnership (PPP) mode-a solar power siam chhuah a, power purchase agreement ziah belh chu kawlpheetha Mizoram intodelhna kalkawng pawimawh ber ni loa an hriat thu an sawi a. CESJ chuan, PPP mode-a power siam chhuahna leh siam tumna hmun hrang hrang - Vankal, Tlungvel, Keifang, North Vanlaiphai, Thenzawlte leh hmalakna tura inremna awm sate chu enfel hmasak an duh a. Solar power chu chhûn lamah chauh hman theih a nih avangin zan lamah phai atangin kawlpheetha lak reng a ngai tho niin an sawi.

CESJ tarlan danin, PPP mode-a kawlpheetha siam chhuah a, sorkarin a lei lêt leh tura inremna siam chu a man a sang a. Kawlpheetha siam chhuah atangin unit khat Rs 4 leh pawisa pangain an lei a, chu ai chuan India Power Market (Indian Energy Exchange Limited)-ah a man ngai emaw, tláwm zawka leiin environment humhalhna a ni nghal dawn niin a sawi bawk.

<><><>

BANK FRAUD-CBI

Mizoram Rural Bank (MRB) chairman ngenna angin MRB Champhai Branch-a sum puktir dana thil dik lo tak awm ni a hriat chu Police-in an chhui hnu-ah Central Bureau of Investigations (CBI) kuta hlan a ni.

Thu dawn danin Champhai MRB Branch atang hian KCC account ami chu mi 1,290-te bank account hmangin cheng vaibelchhe 20 leh nuai 64 chuang khatihlai a branch manager khan kum 2021 chho khan a puktir a. Heta pawisa pukte hi Savings Bank account pakhat chhun luh a ni tih hriat chhuah a ni a. He savings bank account neitute hi Lucas Thangmangliana, PS Zatlunga, T Paulamthanga, Tuangzapauva leh Jacob Thanglianchina te an nih thu MRB hotute chuan an sawi a. Kum 2022 August thla bul lamah khan Champhai Police Station-ah FIR thehluh a ni a. Police lamin charge sheet thehluh tawh mah se, Bank danah bank sum chingpen chu CBI chhuitir tur tih a awm avangin MRB Chairman ngenna angin kumin February thla laihawl vel khan Lokayukta chuan CBI kutah he thil chhui hna hi a pe ta a ni. CBI lam atang erawh chuan engmah hriat a la ni lo thung.

Heta loan an pek chhuah hi rulh a awm lo reng reng ni a sawi a ni a. Inbumna thil a nih bakah MRB hian an hloh nasa hle a ni. Pawisa luh khawmna Savings Bank account neitu zing ami pakhat Lucas Thangmangliana hi mihring sam (hair) hmanga dik lo taka sumdawng zinga telah puh a ni a. Champhai a a in pawh Enforcement Directorate a thawkte'n an dap a, mahse Lucas Thangmangliana hi Myanmar lamah a lo bibo hman ni a thu dawn a ni. Enforcement Directorate hi Hyderabad atanga Mizoram kaltlanga China a sam hmanga sumdawmna-ah hian Hyderabad a company thenkhat bakah St. Mary's Gem Industries leh Sun Moon Human Hair Champhai leh Thari Enterprises, Aizawl-te pawh an dap a ni.

<><><>

MNF CANDIDATE

Lok Sabha inthlan lo awm tura Mizoram biala MNF party candidate Pu K. Vanlalvena chuan MNF candidate ni mah se 'mipui dandidate' a a inngaih thu a sawi.

Rajya Sabha MP ni lai Pu K. Vanlalvena chuan vawiin khan Kolasib-ah chanchinbumite kawmin Parliament-ah BJP kaihhruai NDA lama a thut thu leh Lok Sabha a thlan tlin a nih pawhin NDA lama a thut tur thu a sawi a. NDA-ah Kristian MP thahnem tak an tel thu sawi in, Mizoram leh hnam leh sakhaw tana thalo tur, entir na'n, UCC te sorkar laipui in dana siam a tum a nih chuan theihtawp chhuah a do a tum thu leh Hindu Nationalism din tuma hma an la a nih pawhin a tawp thleng a do a tum thu a sawi. Zofa hnam hrang hrangte inhuikhawm a, inkuahkhawm a tul tawh tawh thu sawi-in, hemi atan hian MP a nih zel hi a mamawh a ni, a ti. Rajya Sabha MP chuan MP fund hman danah tute'n emaw sawiselin, fund hmang tha lo anga an sawi thu a tarlang a, a MP fund hman dan hre duh chuan RTI hmangin a dil chhuah theih vek, a ti a. Kum 2020 leh 2021 chung khan Covid hrileng

vangin MP zawng zawngte'n fund an hmuh loh vek thu a sawi a, a hnu lama a hmuh ang ang te chu daih zai taka a hman thu sawi in, Pu Vena chuan, MP inthlan lo awm chu fel fai leh thianghlim taka neih zawh a duh thu leh vote nei zawng zawngte'n vote thlak ngai pawimawh theuh turin a chah a ni.

MP Candidate tawiawmtu MNF Sr. Vice President Dr. R. Lalthangliana chuan an party MP candidate Pu K.Vanlalvena chu mi huaisen, a chanchin inzawh buai ngai lo leh mi rintlak ni a a hriat thu a sawi a. Lok Sabha inthlan chu state a rorellai party tan tling chiang sa anga ngaih ngawt theih a nih loh thu a sawi bawk a ni.

<><><>

PC CANDIDATE

PC Party MP Candidate Pi Rita Malsawmi chuan, ram hmasawn nan hmeichhia in hma an sawn a ngai a. Central sawrkar-in hmeichhia te tana eizawna siamna tur ruahmanna tha tak tak a siamte chu hmang tangkaiin MP a lo nih chuan hmeichhiate tana hmasawna ropui tak a thlen dawn a ni, a ti.

Vawiin khan PC Party Office-ah an Party Campaign Committee an thukhawm a, Campaign dan tur thui tak duan a ni a. He hunah hian Pi Rita Malsawmi chuan, sorkar laipui ruahmanna hrang hrang hmang tangkaiin Mizoram tih hmasawn theih a nih zia a sawi a. Hmeichhia te tana hmasawna tur ruahmanna awm that zia leh state sawrkarin a bawhzui that loh avanga a nih dan tur anga mipuiin an hlawkpui loh dan te a sawi a; MP a nih chuan helam hian a lak nasat tur thu a sawi ni.

<><><>

HOLI

Thatna-in sualna a hneh lawmna, Rawng kutpui, Holi chu vawiin khan ram pumah uar taka hman a ni a, duhsakna chibai inbuk tawnin rawng chi hrang hrang an intheh tawn a, thil thlumte eiin upate malsawmna an dil bawk a ni.

He ni pual hian President Droupadi Murmu leh Vice President, Jagdeep Dhankar-a ten ram mipuite duhsakna chibai an hlan a, President Murmu-i chuan rawng kutpui chu ram mipuite inkara hmangaihna leh inunauna tinghetu, mitin tana hlimna leh malsawmna thlentu a nih a beisei thu a sawi a ni.

<><><>

BJP RELEASES 5TH LIST OF CANDIDATES

BJP chuan Lok Sabha inthlanpuia an candidate tur hming list 5-na, vawiin khan a tlangzarh a, he list-ah hian hming 111 a chuang a ni. Filmstar Kangana Ranaut-i chu Himachal Pradesh-a Mandi bialah a ding dawn a, Odisha-a Sambalpur bialah Union Minister, Dharmendra Pradhan, Puri-ah BJP thupuangu, Sambit Patra a ding ang a, Ujiarpur-ah Union Minister Nityanand Rai, Begusarai-ah Union Minister Giriraj Singh, Patna Sahib bialah BJP hruaitu, Ravi Shankar Prasad a ding dawn a ni.

Uttar Pradesh-a BJP MP, Varun Gandhi-a bial, Pilibhit seat-ah UP Minister Jitin Prasada a ding ang a, Cong hruaitu thin, nimina BJP-a lawm luh, Naveen Jindal-a chu Haryana-a Kurukshetra bialah a ding ang. Calcutta High Court judge hlui, Abhijit Gangopadhyay-a chu West Bengal-a Tamuk seat-ah a ding dawn a, Belgaum bialah Karnataka Chief Minister hlui, Jagadish Shettar-a ding ang.

BJP hian Sikkim Assembly inthlana an candidate tur hming 14 a puang bawk a ni.

<><><>